

## JAMES, DAVID ('Dewi o Ddyfed'; 1803 - 1871), clerigwr ac awdur

**Enw:** David James  
**Ffugenw:** Dewi O Ddyfed  
**Dyddiad geni:** 1803  
**Dyddiad marw:** 1871  
**Priod:** Emma James (née Armitage)  
**Priod:** Margaret James (née Batty)  
**Plentyn:** Herbert Armitage James  
**Rhiant:** Ann James  
**Rhiant:** Abraham James  
**Rhyw:** Gwryw  
**Galwedigaeth:** clerigwr ac awdur  
**Maes gweithgaredd:** Crefydd; Llenyddiaeth ac Ysgrifennu  
**Awdur:** Griffith Milwyn Griffiths

Ganwyd 6 Ionawr 1803 ym Maenor Deifi, Sir Benfro, mab Abraham ac Ann James. Addysgwyd ef yn ysgol ramadeg Aberteifi ac yn Ystrad Meurig. Ordeiniwyd ef yn ddiakon, 19 Tachwedd 1826, a phenodwyd ef i guradaeth Granston, Sir Benfro. Urddwyd ef yn offeiriad, 2 Medi 1827. Trwyddedwyd ef i guradaeth Jordanston, Sir Benfro, 31 Gorffennaf 1828, a bu'n gurad yn Almondbury, sir Efrog, 1829-36. Tra yn Almondbury priododd ddwy waith. Ei wraig gyntaf oedd Margaret Batty o Fenay Hall, a'r ail Emma Armitage o Milnsbridge House. Yr oedd dau o blant o'r briodas gyntaf, a thri o'r ail. Yn 1836 cafodd fywoliaeth Kirkdale, Lerpwl. Rhoddwyd gradd M.A. iddo gan archesgob Caergaint yn 1849, a gradd Ph.D. gan Brifysgol Heidelberg yn 1853. Yn Chwefror 1853 apwyntiwyd ef yn warden Coleg Llanymddyfri, ond yn 1854 derbyniodd fywoliaeth Marsden, sir Efrog. Oddi yno daeth i eglwys Panteg, sir Fynwy, 11 Tachwedd 1856, a bu yno hyd ei farw ar 2 Awst 1871.

Yr oedd yn Gymro brwd ac yn wr adnabyddus ar lwyfan yr eisteddfod. Gwrthwynebai yn gyndyn apwyntio esgobion ac offeiriad di- Gymraeg i esgobaethau ac eglwysi yng Nghymru. Tra yn Lloegr daeth yn aelod diwyd o'r gymdeithas a elwid ' Association of Welsh Clergy in the West Riding of the County of York,' cymdeithas a gymerai ddiddordeb mawr ym mhwnoc clerigwyr di- Gymraeg. Cyfarfu'r gymdeithas yn 1856 yn ficerdy Marsden, sef plwyf David James.

Ymhlith ei weithiau cyhoeddedig ceir, *The Patriarchal Religion of Britain; or a Complete Manual of Ancient British Druidism*, 1836; darlith, *The Doctrine of the Trinity*, 1839; pamffled, *The Pope's Supremacy Disproved and the Apostolic Origin and National Independence of the British Church Demonstrated*, 1849; darlith, *Purgatory*, 1851; pregeth, *Peter without a Primacy and the Pope a Usurper*, 1851; darlith, *The Siege of Derry*, 1851; *The Apostolic Origin and Scriptural Character of the Rite of Confirmation* (ail arg. 1851). Brawd iddo oedd [Thomas James](#) ('Llallawg'), a mab iddo oedd [H. A. James](#).

### Awdur

Griffith Milwyn Griffiths

### Ffynonellau

J. Morgan, *A Biography of the Reverend David James ... Dewi o Ddyfed, sometime rector of Panteg* (Pontypool 1925)

*Catalogue of Printed Literature in the Welsh Department, Cardiff Free Libraries* (1898)

*Transactions of the Royal National Eisteddfod of Wales* (Caerdydd 1884), 613

*Y Geninen*, Mawrth 1888, 1889, 1897

T. R. Roberts, *Eminent Welshmen: a short biographical dictionary of Welshmen... from the earliest times to the present* (1908)

Bradney, yn *Journal of the Welsh Bibliographical Society*, iii, 243

*Archifau Esgobaeth Ty Ddewi yn Llyfrgell Genedlaethol Cymru*

*Archifau Esgobaeth Llandaf yn Llyfrgell Genedlaethol Cymru*

H. Blackwell, [NLW MSS 9261A: A Dictionary of Welsh Biography](#)

*Yr Haul*, Tachwedd 1871

### Dolenni Ychwanegol

VIAF: [170498721](#)

Wikidata: [Q20732831](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

